

HUBENTUD DEN MOVECION

—Pa Mercedes Abdul...

"Hey...Ta Pasco", un tremendo produccion:


Esaki ta e prome di un coleccion di cd di pasco cu Edjean tin intencion di produci

Seccion Hubentud den Movecion a entrevista nos hoben cantante EDJEAN SEMELEER, tocante su produccion pa Pasco, un precioso CD yama "Hey...ta Pasco". Esaki ta e prome CD di Pasco cu Edjean ta graba, y lo no ta e ultimo pasobra intencion ta pa traha un coleccion di cual esaki ta e prome volumen.

E INICIATIVA: Edjean a conta nos cu e iniciativa pa e produccion aki a nace na aña 2002 tempo cu el a participa den un CD cu varios cantante, y el a gusta e idea masha hopi mes, y asina a haya e deseo pa produci e aña aki algo riba su mes, pero invitando tambe otro cantantenan.

"Na Juli di e aña aki mi a cumenza busca composicion, pero mi no kier a haci un CD mi so, anto mi a invita un par di cantante, y e idea a worde aprecia masha hopi mes. Den e CD tin composicionnan di Hubert Booi, Maybelline Arends-Croes, Roy Olive, Edmond (Juny) de Freitas, Martin Quandus, Everick Rincones y Doodle Sophia, y algun cancion existente caba. E fecha cu tabata tin pa e CD sali riba mercado tabata den comienzo di November, pero ta e cancion promocional so (Ta Navidad) mi a logra pa e fecha ey. E CD completo a sali dia 28 di November", Edjean a conta nos.

No tabata nada facil pa e hoben wak su soño aki realiza. Varios factor a hunga un rol, entre otro e parti financiero. Hopi a priminti, pero na final e no haya sponsor, y ta cu ayudo di su welo y su mayornan el a logra



financia un produccion di calidad hopi halto.

Tin dos persona cu a yude hopi bon, kendenan ta Ruben Garcia y Edwina Werleman. "Mi ta sinti hopi satisfecho di mira mi CD riba mercado y cu hopi hende tin comentarionan hopi positivo di dje. E tropiezonan envez di a demotiva mi a motiva mi mas ainda pa mi sigui y persevera pa logra un produccion di nivel halto", Edjean a menciona.

"Hey...ta Pasco", ta volumen uno y mi intencion ta pa graba volumen dos, pa aña 2004, y asina consecutivamente pa e bira un coleccion, den cual lo mi keda invita diferente cantante. Fuera di esey mi tin gana di graba un CD di musica popular, durante e transcurso di e aña cu ta bin. "Mi intencion ta pa cumenza hopi tempran buscando sponsors pa e produccionnan aki. Ya caba mi tin un idea ken mi ta bay acerca y cu a

monstra un interes sincero caba, specialmente despues cu nan a scucha e producto, cu te aworaki ta bendiendo bon, danki Dios", Edjean a expresa.

SU DESEO PA BIRA POLITICO: Actualmente Edjean ta bayendo VWO-5. Despues di VWO e lo studia ley, y el a conta nos di con. "Algo cu semper a fascina mi ta e tereno politico. Mi ta kere cu un bon politico mester sa con tur cos den un pais ta hinca den otro y esaki, entre otro estudio, bo por complementa studiando ley. Cu conocimiento di ley combina cu un bon curazon un politico por haci hopi pa su pais", Edjean a comenta.

ASIDUO NA REUNION-NAN DI PARLAMENTO: Edjean ta un hoben asiduo na e reunionnan di Parlamento, locual no ta usual entre nos hubentud. Edjean ta conta nos pakico:

"Mi tin tres aña consecutivo cu mi a presencia reunionnan

di Parlamento, cu excepcion di algun, por ehemplo e temporada di fin di aña aki mi no por a bay debi na produccion di mi CD.

Mi ta haya interesante con e politiconan, specialmente esnan mas hoben, ta trata diferente topico den Parlamento. Aunque mi ta haya tin biaha e nivel di discusion ta laga hopi di desea.

Mi ta keda te madruga, 3'or of 4'or cu e reunion ta caba, di manera cu mi por keda hopi bon informa kico ta sosode den e reunionnan di Parlamento. Mi ta corda e ultimo reunion di 2001, cu Parlamento anterior a baha, tabata hopi conmovedor. E dia ey mi a wak tog, con bon nan ta cu otro como ser humano. Esey por a worde refleha door di e diferente discursonan di despedida cu cada un a duna", Edjean a comenta.

SI UN DIA EDJEAN LO BIRA POLITICO? KICO E LO CAMBIA? Riba e pregunta aki e hoben a contesta: "Si mi lo drenta Parlamento, por ehemplo, lo mi haci tur mi esfuerzo pa cambia e nivel di discusion, y no reacciona riba ofensa, pero purba wanta e discusion riba e contenido y asina duna ehemplo di disciplina. Como politico, lo mi purba involucra mas hoben den tereno di arte y deporte. Crea mas facilidad pa e mucha y hobennan haya mas instruccion, pasobra na Aruba tin hopi talento pero e parti di instruccion no ta accesible pa tur hende. Podise dunando innovacion di enseñanza (PRIPEB por

ehemplo), mas sosten financiero y moral pa nan por cumpli cu e programa di arte cu nan ta bay introduci, y wak kico falta riba tereno di deporte pa impulsa esaki mas na school".

MENSAHE PA NOS HUBENTUD Y NOS COMUNIDAD: Pa nos hubentud Edjean tin e siguiente mensahe: "Traha duro pa boso metanan. Pasobra cu perseverancia y fe den Dios bo ta logra, y semper actua cu huicio. Pa e dianan di fiesta aki, pa nos comunidad en general no abusa di consumo di alcohol, y celebra Pasco y Aña Nobo di e manera mas sano posible, pa asina ricibi un aña nobo contento y den union familiar.

Algo hopi importante ta pa no solamente ricibi pero duna tambe. Duna amor y comprension cu ta e base di paz den cada hogar y den cada un di nos como persona".

GRADICIMENTO: Edjean a expresa e siguiente palabranan di gradicimento: "Na prome lugar pa Papa Dios, na mi mayornan, Jeanedy, mi welo, Edwina, Ruben, Johnny, Hildward, compositornan, musiconan, cantantenan, Erin, Maybelline, Donna, Raquel, mi mehor amigo Miguel y su famia, Juan Carlos, Victor, Antonio, Mauro, George, Elaine, Carlmichael, tur mi amigo y amiganan cu a yuda mi hopi bon. Tur locutor y periodistanan danki pa e comentarionan hopi positivo. Mi fanaticonan cu semper tey pa mi y e pueblo di Aruba cu semper a sa di aprecia y apoya mi".

PROFAR'S EDUCATION INSTITUTE

DIRECTOR: DRS. ROALD, H. MICHEL, SICOLOGO

E lugar profesional cu hopi experiencia den guia y cuido despues di skol pa alumnonan di mavo, have, vwo, ta ofrece:

- * metodonan eficiente pa studia
- * apoyo individual y den grupo
- * scohemento di un vakkenpakket
- * preparacion special pa proefwerk



- * preparacion intensivo pa examen
- * posibilidad pa hanja cifranan mihor
- * seleccion di estudio y profesion
- * testnan sicológico avansa

PA MAS INFORMACION BISHITA NOS WEBSITE Y SCOG E PAGINA DI BO INTERES. OF YAMA, MANDA UN FAX, OF EMAIL NOS.

Tel. 5 8 2 - 7 9 2 0 Si nos no por atendebo mesora, semper laga bo number y number di telefon, y nos ta yamabo bek. Fax. 5 8 3- 0 4 8 9

email: profarco@setarnet.aw y profar@profarco.com website: <http://profedin.homestead.com>